

Nr. Prot.
Nr. Dok. 202300635/1

Tiranë ___/___/2023

Lënda: *Rekomandime për inspektimin e kryer në ambientin e shoqërimit dhe të sigurisë të Drejtorisë/Komisariatit të Policisë Korçë.*

Drejtuar: **Shefi i Komisariatit të Policisë në Korçë**
Z. Gentian DIKO

KORCË

Për dijeni: **Drejtor i DVP në Korçë**
Drejtues i Lartë Gjovalin LOKA

KORCË

Z. Muhamet RRUMBULLAKU
Drejtor i Përgjithshëm i Policisë së Shtetit

TIRANË

Të nderuar zotërinj,

Duke ju falenderuar për bashkëpunimin e deritanishëm dhe duke vlerësuar angazhimin dhe punën e të gjithë stafit të institucionit që ju drejtoni, si dhe frymën e mirë të bashkëpunimit dhe mirëkuptimit midis institucioneve tona, në vijim po ju njohim mbi monitorimin që institucioni i Avokatit të Popullit kreu në Komisariatit të Policisë Korçë.

Mekanizmi Kombëtar për parandalimin e torturës, trajtimit ose dënimit të egër, çnjerëzor ose poshtëruës, seksion pranë Avokatit të Popullit, në vijim Mekanizmi Kombëtar (MKPT), bazuar në nenin 19/1 të ligjit nr.8454, datë 04.02.1999, "Për Avokatin e Popullit", i ndryshuar dhe nenin 81 të ligjit nr. 81/2020, "Për të drejtat dhe trajtimin e të dënuarve me burgim dhe të paraburgosurve", kreu këtë inspektim në Komisariatit të Policisë Korçë. Inspektimi u krye në datën 05.07.2023, sipas një Plani Vjetor Inspektimi të miratuar nga Avokati i Popullit. Në përbërje të grupit inspektues ishin znj. Nertila Qafzezi, znj. Gloria Çarkaxhiu dhe znj. Lindita Dedëgjoni me detyrë Nd/Komisionere pranë Mekanizmit Kombëtar.

Inspektimi kishte si qëllim verifikimin e respektimit të standardeve të përcaktuara në ligjin nr.108/2014, "Për Policinë e Shtetit", i ndryshuar, procedurën standarde "Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe

zgjdhja e kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr.925, datë 18.07.2019, procedurën standarde “*Rregullat teknike të shoqërimit në mjediset e Policisë së Shtetit*”, miratuar me Urdhrin e Drejtorit të Përgjithshëm të Policisë së Shtetit nr.938, datë 24.07.2019, si dhe zbatimin e rekomandimeve të Avokatit të Popullit të bëra në inspektimin e një viti më parë.

Institucioni i Avokatit të Popullit, pasi u njoh me konstatimet e grupit inspektues, ka detyrimin kushtetues dhe ligjor t’ju parashtrorë konkluzionet përfundimtare, si më poshtë vijon:

Shënime të përgjithshme

Në përputhje me metodologjinë e zhvillimit të inspektimit në institucionet ku mbahen e trajtohen shtetas të privuar nga liria, grupi i punës u takua me Shefin e Komisarariatit të Policisë në Korçë, z. Gentian Diko dhe shefin e rendit z. Mariglen Jaçellari, të cilët u vunë në dijeni në lidhje me qëllimin e inspektimit.

Drejtuesi i Komisarariatit informoi grupin e inspektimit në lidhje me respektimin dhe trajtimin e shtetasve gjatë qëndrimit të tyre në mjediset e Komisarariatit në cilësinë e të shoqëruarve dhe të ndaluarve/arrestuarve, sipas legjislacionit në fuqi dhe akteve ndërkombëtare për këtë qëllim, plotësimin e kushteve në dhomat e shoqërimit dhe të sigurisë, si dhe masat e marra për plotësimin e rekomandimeve të lëna nga Institucioni i Avokatit të Popullit në inspektimin e mëparshëm të zhvilluar në datë 04.07.2022¹.

Grupi i inspektimit, pasi mori informacionin e nevojshëm vijoi takimin me përgjegjësën e dhomave të sigurisë dhe punonjësën e zyrës së informacionit të dhomave të shoqërimit, inspektoi mjediset ku mbahen dhe trajtohen personat e shoqëruar dhe të ndaluar/arrestuar, verifikoi dhe administroi dokumentacionin që plotësohej prej punonjësve të policisë sipas procedurave standarde, vizitoi zyrat e specialistëve të policisë të këtij institucioni që kryejnë veprime procedurale me shtetasit e shoqëruar dhe të ndaluar/arrestuar, si dhe zhvilloi intervistë konfidenciale me personat që ndodheshin në dhomat e sigurisë në momentin e inspektimit, në lidhje me respektimin e të drejtave dhe zgjidhjen e kërkesë/ankesave.

Lidhur me verifikimin e zbatimit të rekomandimeve të Institucionit të Avokatit të Popullit nga inspektimi i vitit të kaluar, rezultoi se:

- ✓ Ishin marrë masat për organizimin e trajnimeve të vazhdueshme të punonjësve të policisë që kryejnë shërbime në mjediset e shoqërimit dhe të sigurisë, me qëllim rritjen e kapaciteteve dhe njohurive të tyre për zbatimin rigoroz të rregullave dhe procedurave ligjore, në lidhje me trajtimin e shtetasve në bazë të të drejtave të tyre

¹ *Rekomandime për inspektimin e kryer në ambientin e shoqërimit dhe të sigurisë të Drejtorisë/Komisariatit të Policisë Korçë. K4/I50-2 Dt 18.11.2022*

ligjore dhe standardeve më të larta, duke respektuar dinjitetin njerëzor dhe integritetin fizik e moral të tyre, për kohën që ata qëndrojnë në mjediset e policisë së shtetit, sikurse parashikohet në aktet ligjore dhe nënligjore, si dhe aktet ndërkombëtare për këtë qëllim, nga inspektimi i Avokatit të Popullit u evidentuan mangësi në kuptimin e detyrimeve të tyre proceduriale².

- ✓ Ishin marrë pjesërisht masat për krijimin e zyrës (dhomës) ku merren në pyetje personat e shoqëruar, para se të dërgohen në ambientet e sigurisë, në këtë ambient mungonte sistemi i regjistrimit audio.
- ✓ Ishin marrë masat për pajisjen e dhomave të shoqërimit me postera me të drejtat e të shoqëruarve të përditësuar sipas dispozitave të parashikuara në Kodin e ri të Procedurës Penale.

Ndërkohë, grupi i inspektimit konstatoi se nuk kishin gjetur zbatim rekomandimi i mëposhtëm:

- ✓ Nuk ishte zbatuar rekomandimi për krijimin e ambientit të ajrimit për personat e arrestuar në këtë komisariat.

Avokati i Popullit, pasi u njoh me konstatimet e grupit inspektues dhe nivelin e zbatimit të rekomandimeve të lëna nga inspektimi i vitit të kaluar, ka detyrimin ligjor t'ju parashtrijë konkluzionet përfundimtare, duke ju referuar si më poshtë vijon:

Ambienti i shoqërimit dhe kushtet e tyre

Ambienti i shoqërimit në Komisaratin e Policisë Korçë, ishte i ndërtuar përgjithësisht sipas kërkesave të ligjit nr.108/2014, “Për Policinë e Shtetit”, i ndryshuar dhe procedurës standarde “Rregullat teknike të shoqërimit në mjediset e Policisë së Shtetit”, miratuar me Urdhrin e Drejtorit të Përgjithshëm të Policisë së Shtetit nr.938, datë 24.07.2019, ku parashikohet se: “*dhomat e shoqërimit duhet të jenë me sipërfaqe dhe hapësira të bollshme për qëndrim, si dhe të ndara më vete për femrat, meshkujt madhorë dhe të miturit*”.³

Mjedisi i shoqërimit ndodhej në katin e parë të godinës së Komisarariatit dhe përbëhej nga 2 (dy) dhoma shoqërimi, të ndara për personat e rritur dhe për gra. Ndërsa, intervistimi i të miturve kryhej në ambientet e Njesisë për Mbrojtjen e të Miturve dhe Dhunës në Familje, i cili përbëhej nga 3 dhoma. Dhomat e këtij ambienti ishin të kompletuara me tavolina pune për punonjësit e policisë, psikologun, avokatin mbrojtës dhe përfaqësuesin ligjor, si dhe me orenditë e nevojshme kolltuk e karrige për qëndrimin komod dhe ulur të të miturve. Ky

² Ishte organizuar trajnim me të gjithë personelin që kryen shërbimin në mjediset e shoqërimit dhe të sigurisë lidhur me Procedurën Standarde të punës “Rregullat për trajtimin e shtetazve që shoqërohen në mjediset e policisë” miratuar me Urdhër nr.894, datë 19.07.2022, të Drejtorit të Policisë së Shtetit.

³ *Kreu VI, pika 3 e procedurës standarde “Rregullat teknike të shoqërimit në mjediset e Policisë së Shtetit”.*

investim ishte kryer në kuadër të një programi bashkëpunimi midis DPPSH-së me organizatën “Save the children”.

Dhomat e shoqërimit ishin me përmasa 4x5 m secila prej tyre, me sipërfaqe dhe hapësirë të bollshme për qëndrimin e personave, të kompletuara me orenditë e nevojshme si tavolina pune për specialistët e ndihmës specialistët e policisë, si dhe karrige me këmbë të fiksuara dhe të pa lëvizshme, për qëndrimin ulur të shtetasve të shoqëruarve. Kapaciteti për secilën dhomë ishte për mbajtjen dhe qëndrimin e 5 (pesë) personave. Në total kapaciteti i dhomave të shoqërimit ishte për 10 (dhjetë) persona.

Dhomat kishin dritare me xham, të siguruara në pjesën e jashtme me skarë hekuri. Përmasat e dritareve ishin të tilla që krijojnë mundësinë e ajrimit dhe ndriçimit të plotë natyral, si dhe kishin ndriçim artificial që furnizohej nga rrjeti elektrik. Dhomat ishin të lyera dhe të pastra nga ana higjieno-sanitare.

Në Komisarlatin e Policisë Korçë **nuk kishte tualete të ndara më vete për gra dhe burra** sipas sipas parashikimeve në procedurën standarde “Rregullat teknike të shoqërimit në mjediset e Policisë së Shtetit”, miratuar me Urdhrin e Drejtorit të Përgjithshëm të Policisë së Shtetit nr. 938, datë 24.07.2019. Në korridorin e këtij ambienti, ngjitur me dhomat e shoqërimit ndodheshin 2 (dy) tualete nga të cilët vetëm njëri ishte funksional tualeti tjetër ishte i mbyllur dhe jashtë funksionit. Përgjatë inspektimit konstatoam se tualeti funksional ishte i pajisur me nyje hidrosanitare, dhe furnizohej rregullisht me ujë të rrjedhshëm, por konstatoam se në këtë ambient mungonte ndriçimi dhe dera e tualetit ishte e dëmtuar.

Korridori i këtij ambienti ishte i monitoruar me kamera, për mbajtjen në vëzhgim të vëprimeve që kryejnë punonjësit e policisë me të shoqëruarit.

Në momentin e inspektimit nuk kishte shtetas të shoqëruar. Ndërsa, për periudhën Janar–korrik 2022, ishin shoqëruar për në mjediset e këtij komisariati 391 persona një numër i konsiderueshëm. Nga këqyrja e regjistrit të të shoqëruarve, nuk u konstatoan raste të mbipopullimit në dhomat e shoqërimit. Në korridorin e këtij ambienti ishin vendosur postera me të drejtat ligjore të personave të shoqëruar

Në Komisarlatin e Policisë Korçë ishte krijuar rishtas një dhomë intervistimi , kjo dhomë ishte e pajisur me dy karrige një tavolinë dhe një kompjuter gjithashtu ishte e monitoruar me kamera, por mungonte sistemi audio. Megjithatë kjo dhomë i plotëson pjesërisht standardet e kërkuara, pasi referuar kapaciteteve ishte pamjaftueshme për të mbuluar punën e të gjithë oficerëve të policisë gjyqësore me personat e shoqëruar/ndaluar.

Në vlerësimin e Avokatit të Popullit, dhoma e intervistimit për personat e shoqëruar që dyshohen për kryerjen e një veprë penale ose janë në hetim, (para se të kalojnë në dhomat e sigurisë), e monitoruar me sistemin audio/viziv, shmang mundësinë e kryerjes së

veprimeve të paligjshme me këta shtetas nga punonjësit e policisë gjatë marrjes në pyetje të tyre.

Nga informacioni i punonjësit të policisë në zyrën e informacionit, si dhe nga verifikimi i dokumentacionit u konstatua se, në këtë komisarjat zbatohet detyrimi ligjor i parashikuar në nenin 109/5 dhe 122/5 të ligjit nr.108/2014 “Për Policinë e Shtetit”, i ndryshuar, si dhe në kapitullin VII, pika a.3.4 të procedurave standarde për plotësimin dhe dhënien e një kopje të procesverbalit të veprimeve të kryera me të shoqëruarit, nga punonjësit e policisë që ishin ngarkuar me detyrën e kryerjes së verifikimit dhe trajtimin e çështjes përkatëse. U evidentua gjithashtu se, për personat e shoqëruar mbahej edhe “Formulari i raportit të Shoqërimit ose Ndalimit/Arrestimit”, nga punonjësi i policisë që kryente shoqërimin në mjediset e Komisarjatisë, ku përcaktohet përveç të dhënave edhe shkaku i shoqërimit, koha e qëndrimit të personit në këto ambiente dhe pretendimet e të shoqëruarit në lidhje me trajtimin nga punonjësi i policisë.

Grupi i inspektimit konstatoi se, në zyrën e informacionit ishte hapur më vete regjistri i evidentimit të të dhënave për personat e shoqëruar të mitur dhe për periudhën e inspektimit ishin regjistruar të dhënat për 6 persona.

Nga intervistimi i punonjësve të policisë, në Komisarjatin e Policisë Korçë karta me të drejtat e personave të shoqëruar ju jepej shtetasve që në momentin kur atyre ju privohet liria, pra në orën e hyrjes në mjediset e Komisarjatisë.

Kjo praktikë është në përputhje me të drejtën për informim që gëzojnë shtetasit e shoqëruar në momentin e parë të shoqërimit, referuar rekomandimeve të Avokatit të Popullit, por edhe raportit me rekomandime të Komitetit Europian për Parandalimin e Torturës dhe Trajtimit Çnjerëzor dhe Degradues (KPT-së), gjatë vizitës së tyre në Shqipëri në datat 20-30 Nëntor 2018⁴, ku thuhet shprehimisht se, shtetasit që shoqërohen në mjediset e Policisë të Shtetit duhet **“të jenë plotësisht të informuar për të drejtat e tyre nga fillimi i privimit të tyre nga liria...”**.

Ambienti i sigurisë, kushtet e tyre dhe trajtimi i të ndaluarve/ arrestuarve.

Në Komisarjatin e Policisë në Korçë dhomat e sigurisë ishin përgjithësisht të ndërtuara sipas kërkesave të parashikuara në procedurën standarde *“Trajtimi dhe Sigurimi i Personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesës/ankesave të tyre”*, miratuar me Urdhrin e Drejtorit të Përgjithshëm të Policisë së Shtetit nr.925, datë 18.07.2019.

⁴ shih: <https://rm.coe.int/16809cb571> “Response of the Albanian Government to the report of the European Committee for the Prevention of Torture and Inhuman or Degrading Treatment or Punishment (CPT on its visit to Albania)” from 20 to 30 November 2018 CPT/Inf(2020).

Ambienti i sigurisë përbëhej nga 6 (gjashtë) dhoma sigurie, me kapacitet për 6 (gjashtë) persona. Ato ishin të ndara 4 (katër) dhoma për personat e rritur, 1 (një) për gra dhe 1 (një) për të mitur.

Dhomat e sigurisë janë të ndërtuara përgjithësisht sipas parametrave teknik të përcaktuar në procedurën standarde, të ndara në dy ambiente me një skarë hekuri dhe derë, në ambientin për fjetje dhe në paradhomë. Nisur nga hapësira dhe sipërfaqja e secilës dhomë, ato plotësonin normat dhe parametrat teknikë jetësorë për një person të arrestuar apo ndaluar, pasi sipërfaqja e përgjithshme ishte jo më pak se 10 metra katrorë, ambienti i qëndrimi me sipërfaqe 6 m² dhe paradhoma me sipërfaqe 4 m².⁵

Çdo dhomë ishte e pajisur me një krevat metalik me këmbë të palëvizshme dhe ishin të kompletuar me dyshek, batanije dhe jastëk. Në ambientin e qëndrimit ndodhej dhe tualeti, ndërsa në paradhomat e çdo dhome sigurie ndodhej një lavaman me çezmë që kishte ujë të rrjedhshëm, e cila përdorej për pastrimin vetjak.

Dritaret e dhomave kishin përmasa të tilla që krijojnë mundësinë e depërtimit të ajrit dhe dritës natyrale. Ato furnizoheshin me energji elektrike nga rrjeti elektrik dhe në rast ndërprerje, kishte gjenerator si burim alternativ.

Të ndaluarit/arrestuarit kishin akses për larjen e trupit në një ambient të posaçëm i cili ishte i përbërë nga dy tualete⁶ **por vetëm një prej tyre ishte funksional** me (dush me ujë të ngrohtë), i cili ndodhej brenda korridorit, në ambientin e sigurisë.

Dhomat e sigurisë ngroheshin nga çillerat që lidheshin me sistemin qendror të ngrohjes me kaldajë gjatë periudhës së dimrit, sikurse parashikohet në procedurën standarde: *“Trajtimi dhe Sigurimi i Personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”*.

Në korridorin e ambientit të sigurisë, kishte aparat telefoni fiks për të mundësuar lidhjen e punonjësit të shërbimit në dhomat e sigurisë me sallën operative të Komisarariatit, në rastet e tentativave apo ngjarjeve të rënda me të ndaluarit/arrestuarit, si dhe për të kërkuar ndihmë dhe ndërhyrje të shpejtë. Në dhomat e sigurisë ishin instaluar buton zile/sinjali të montuara në mur për kontaktin e të arrestuarve/ndaluarve, me punonjës të policisë në rast nevojë.

⁵ *Kreu VIII, pika 3.3.3 e Procedurës standarde “Trajtimi dhe Sigurimi i Personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”, miratuar me Urdhrin e Drejtorit të Përgjithshëm të Policisë së Shtetit nr.925, datë 18.07.2019.*

⁶ *Urdhër 925, datë 18.07. 2019, Procedura standarde: “Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre”. Pika 9. Ambienti për larjen e trupit.9.1 Brenda sistemit të dhomave të sigurisë ndërtohen dhe funksionojnë ambiente të posaçme që shërbejnë për larjen e trupit të arrestuarve/ndaluarve.*

Në ambientin e sigurisë ndodhej dhoma e mjekut, e cila shërben për kryerjen e vizitave mjekësore të personave të ndaluar/arrestuar, ruajtjen e dokumentacionit që mbahet prej tij, si dhe mbajtjen e medikamenteve të nevojshme për rastet e urgjencave. Kur gjendja shëndetësore e të ndaluarit/arrestuarit paraqitet e përkeqësuar, me rekomandimin e mjekut, personi shoqërohet menjëherë për në Spitalin Rajonal të Korçës.

Dhoma ishte e pajisur me shtrat për kryerjen e vizitave mjekësore, tavolinë pune, karrige dhe një raft prej druri i mbyllur me bravë për mbajtjen e regjistrave dhe të barnave mjekësore. Ngrohja e ambientit realizohej me ngrohje qendrore.

Brenda ambientit të sigurisë ndodhej edhe dhoma për marrjen në pyetje të ndaluar/arrestuarve nga prokurorët apo oficerët e policisë gjyqësore, e cila shërbente njëkohësisht dhe për takimin e këtyre personave me avokatët mbrojtës, e cila ishte e monitoruar nga sistemi i kamerave. Kjo dhomë ishte e pajisur me tavolinë pune dhe karrige me këmbë të fiksuara në dysHEME në mënyrë të palëvizshme për qëndrimin ulur të personave, të cilat ofrojnë kushte pune për përfaqësuesit e organit të akuzës, si dhe për avokatin mbrojtës të tyre.

Hyrja kryesore e ambientit të sigurisë, korridori i tij dhe hyrjet në dhomat e sigurisë monitoroheshin me 3 kamera, përgjatë 24 orëve. Kamerat administroheshin nga punonjësi i IT-së në DVP Korçë dhe afati i ruajtjes së pamjeve filmike ishte për 30 ditë.

Nga informacioni i punonjësve të policisë dhe intervista e zhvilluar me personat që ndodheshin në dhomat e sigurisë në momentin e inspektimit, rezultoi se, të ndaluarit/arrestuarit trajtoheshin me ushqim sipas normave për trajtimin me ushqim të përcaktuar në vendimin nr.189, datë 15.03.2017 *“Për trajtimin me ushqim të punonjësve, të studentëve dhe të kursantëve në institucionet arsimore të Policisë së Shtetit, si dhe të shtetasve të ndaluar dhe arrestuar deri në sqarimin e pozitës së tyre”*. Atyre ju sigurohej 3 vakte ushqim në ditë, i cili përgatitej nga një subjekt privat sipas kontratës së lidhur me DVP Korçë dhe servirej me shërbim katering. Në dhomat e sigurisë nuk kishte ambiente ajërimi për personat e arrestuar.

Në momentin e inspektimit, në ambientin e sigurisë ndodheshin dy persona të arrestuar. Grupi i inspektimit intervistoi personat e arrestuar, të cilët konfirmuan se, ishin trajtuar në mënyrë korrekte gjatë kohës së marrjes në pyetje nga oficerët e policisë gjyqësore dhe qëndrimin në ambientin e sigurisë, personat e arrestuar mbaheshin brenda afatit kohor sipas parashikimeve ligjore.

Shtetasit e intervistuar kishin dijeni për identitetin e punonjësit të policisë me të cilin kishte marrë kontakt dhe ishin kryer veprimet proceduriale, gjatë ndalimit/arrestimit punonjësit e policisë ishin identifikuar, duke u prezantuar me gjeneralitetet dhe detyrën që kryenin.

Personave të ndaluar/arrestuarve iu ishin dhënë nga oficerët e policisë gjyqësore kopje të urdhër ndalimit/arrestimit, të kontrollit personal dhe letrës për njohje me të drejtat e tyre.

Në Komisariatit e Policisë Korçë, zyra për marrjen në pyetje të shtetasve të ndaluar/arrestuar nga oficerët e policisë gjyqësore apo prokurorët, që ndodhej në ambientin e sigurisë, ishte e monitoruar me kamera.

Për periudhën Janar –Korrik 2023 ishin mbajtur në dhomat e sigurisë në cilësinë e personave të arrestuar dhe të ndaluar, gjithsej 250 persona, nga të cilët 6 ishin gra dhe 2 të mitur. Nga këqyrja e regjistrit, nuk u konstatua asnjë rast mbipopullimi në dhomat e sigurisë.

Regjistri i personave të shoqëruar, ndaluar/arrestuar dhe evidentimi i tyre

Sipas parashikimeve në dispozitat e ligjit nr.108/2014 “Për Policinë e Shtetit”, i ndryshuar, si dhe Procedurën standarde “*Trajtimi dhe Sigurimi i Personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre*”, miratuar me Urdhrin e Drejtorit të Përgjithshëm të Policisë së Shtetit nr.925, datë 18.07.2019 dhe në Procedurën standarde “*Rregullat teknike të shoqërimit në mjediset e Policisë së Shtetit*”, miratuar me Urdhrin e Drejtorit të Përgjithshëm të Policisë së Shtetit nr.938, datë 24.07.2019, çdo njësi policore ku ka dhoma shoqërimi dhe dhoma sigurie, duhet të jetë e pajisur me regjistrat përkatës.

Theksojmë se, nga verifikimi i regjistrave dhe librave të shërbimit në Komisariatit e Policisë Korçë, u evidentua se regjistrat të sekretuar dhe vulosur, sikurse përcaktohen në modelet tip të miratuar në procedurat standarde.

Konkretisht, në zyrën e informacionit ndodhej “Regjistri i evidentimit të të dhënave për personat e shoqëruar” sipas tipit “Model nr.1”, konform me procedurat standarde “Rregullat teknike të shoqërimit në mjediset e Policisë së Shtetit”.

Të gjithë personat e shoqëruar në organin e policisë sipas dispozitave të ligjit nr.108/2014 “Për Policinë e Shtetit”, i ndryshuar, regjistroheshin në këtë regjistër nga punonjësit e zyrës së informacionit.

Përgjatë këqyrjes së regjistrit të shoqërimit konstatuam se rubrika e regjistrit mbi njoftimin e familjarëve nuk ishte e plotësuar në mënyrë korrekte, pasi në regjistër nuk ishte i shënuar emri i familjarit të njoftuar me numrin e telefonit përkatës, por ishte shënuar nga specialisti i policisë vetëm “njoftuar familjari” e cila nuk identifikon familjarin i cili ka marrë dijeni⁷, kjo bazuar në Urdhrin, nr. 938 datë 24.07.2019 të Drejtorit të përgjithshëm

⁷ Masat mbrojtëse, veçanërisht në fazat e hershme të shoqërimit, janë thelbësore për të parandaluar abuzimet. Këto masa përfshijnë: dhënie informacionit të të shoqëruarve për të

të Policisë së Shtetit e përcaktuar në “Procedurën standarde të punës për “Rregullat teknike të shoqërimit në mjediset e Policisë së Shtetit ” ku në pikën a.1.2 citohet se: Regjistri i Evidentimit të Personave të Shoqëruar: Të dhënat për realizimin e të drejtës për njoftimin e familjarëve/afërmyve për shoqërimin si: emri, atësia, mbiemri dhe numri i telefonit të personit që është njoftuar për faktin e shoqërimit dhe të vend ndodhjes së personit të shoqëruar, si dhe orën e njoftimit.

Koha e qëndrimit në gjendje shoqërimi të shtetasve ishte e ndryshme nga 1 deri në 4 orë, por në çdo rast brenda afatit deri në 10 orë. Ndërsa në rastet e mbajtjes së personit nën hetim afati kohor shkonte deri në 12 orë.

Në këtë komisariat mbahej dhe regjistri me të dhënat e personave të ndaluar/arrestuar, ku evidentoheshin të gjitha rastet e ndalimeve dhe arrestimeve të kryera nga punonjësit e këtij organi, i cili gjithashtu ishte i sekretuar.

Nga këqyrja e këtij regjistri rezultoi se në rastet e arrestimeve dhe të ndalimeve të personave të shoqëruar, ora e arrestimit/ndalimit përputhej me orën e shoqërimit të tyre në organin e policisë njëherësh për komisariatet e Korçës, Pogradecit, Ersekës dhe Devollit, në varësi të DVP Korçë. Në proces verbalin e arrestimit apo ndalimit, ishte shënuar ora kur personat ishin mbajtur të shoqëruar në mjediset e policisë, pra në momentin kur atyre ju ishte privuar liria.

Grupi i inspektimit, konstatoi se në këtë Komisariat kishte regjistër për evidentimin e kërkesë/ankesave të personave të shoqëruar, të arrestuar dhe të ndaluar, sikurse parashikohet në nenin 115 të ligjit nr.108/2014 “Për Policinë e Shtetit”, i ndryshuar. Nga kontrolli rezultoi se kërkesat ishin me objekt kërkesë për avokat mbrojtës, dhe sipas shënimeve në regjistër ishin të plotësuara.

Ambientet e intervistimit

Në Komisarlatin e Policisë Korçë ishte krijuar rishtas një dhomë intervistimi , kjo dhomë ishte e pajisur me dy karrige një tavolinë dhe një kompjuter gjithashtu ishte e monitoruar me kamera, por mungonte sistemi audio/viziv. Megjithatë kjo dhomë i plotëson pjesërisht standardet e kërkuara, pasi referuar kapaciteteve ishte pamjaftueshme për të mbuluar punën e të gjithë oficerëve të policisë gjyqësore me personat e shoqëruar/ndaluar. Kjo tregon se 11 oficerët e policisë gjyqësore të cilët punojnë në Komisarlatin e Policisë Korçë e kanë të pamundur të punojnë të gjithë në këtë zyrë dhe praktika e marrjes në pyetje në zyrat e tyre të punës vazhdon.

drejtat e tyre; sigurimin e aksesit te një avokati; njoftimin e anëtarëve të familjes dhe/ose një palë të tretë për personin.

Krijimi i zyrave të veçanta ku merren në pyetje shtetasit gjatë kryerjes së veprimeve procedurale nga oficerët e policisë gjyqësore dhe instalimin e sistemit të monitorimit me kamera në këto zyra, është rekomandim i Avokati i Popullit referuar standardeve ndërkombëtare⁸, të cilat e konsiderojnë procesin e monitorimit filmik si një element parësor për mbrojtjen e të drejtave dhe lirive të njeriut, pasi ka efekt parandalues për kryerjen e veprave të dhunshme dhe të dënueshme, si nga ana e të shoqëruarve, ndaluarve e arrestuarve, ashtu dhe nga vetë punonjësit e Policisë së Shtetit. Ky standard ka gjetur rregullim edhe në procedurën standarde të miratuar me Urdhrin e Drejtorit të Përgjithshëm të Policisë së Shtetit nr. 925, datë 18.07.2019, “*Trajtimi dhe sigurimi i personave të arrestuar/ndaluar në ambientet e Policisë së Shtetit, evidentimi dhe zgjidhja e kërkesë/ankesave të tyre*”, duke u shndërruar në rregull të detyruar për punonjësit e policisë.

Nga inspektimi i zyrave të punonjësve të policisë të këtij komisariati, nuk u gjetën sende, prania e të cilave të ekspozonte dhunë tek personat me të cilët ata kryenin veprime procedurale.

Ndihma juridike, psikologjike dhe kujdesi mjekësor

Në Komisarlatin e Policisë Korçë, zbatohet detyrimi për të njoftuar avokatët mbrojtës pa pagesë, për personat e ndaluar/arrestuar që nuk kanë mundësi financiare për të pajtuar një avokat privat.

Avokatët siguroheshin nga lista e avokatëve të dërguar nga organi i prokurorisë, e cila ishte e afishuar në zyrën e përgjegjës të dhomave të sigurisë. Në çdo rast, në regjistër ishte i evidentuar emri i avokatit mbrojtës, personi i ndaluar/arrestuar me të cilin ishte takuar, si dhe oraret e takimit që nga momenti i ndalimit të këtyre personave në mjediset e këtij Komisaritati.

Në rastet e të miturve të shoqëruar në mjediset e Komisaritatit, ai/ajo asistohet nga psikologu që ishte në strukturën organike të DVP Korçë, punonjësit e policisë të trajnuar për të miturit dhe kundër dhunës në familje, avokati mbrojtës dhe kujdestari ligjor.

Në momentin e inspektimit, nga intervista me personat e ndaluar/arrestuar, rezultoi se, ishin pajisur me kopje të urdhërit të ndalimit/arrestimit, letrën e të drejtave, si dhe ishte njohur

⁸ “Një sistem i monitorimit të vazhdueshëm i standarteve dhe procedurave të intervistave të policisë duhet vënë në zbatim, po ashtu; kjo kërkon një regjistrim të saktë të intervistave të personave në ambientet e policisë, të cilat, nëse është e mundur duhet të zhvillohen me pajisje regjistruese elektronike (audio dhe/video). Duhet të kërkohet që të regjistrohet në mënyrë sistematike koha kur ka filluar dhe mbaruar intervista, ndonjë kërkesë të bërë nga i ndaluari gjatë intervistës, si dhe të personave të pranishëm gjatë çdo interviste.” Raporti i CPT-së për Armeninë: CPT/Inf (2016) 31 [par.20].

Konsulto:

<https://rm.coe.int/CoERMPublicCommonSearchServices/DisplayDCTMContent?documentId=09000016806bf46f>

me aktet, provat e nevojshme dhe arsyet e arrestimit ose ndalimit të tij, në zbatim të kërkesave të parashikuara në nenet 34/b, pika 2 dhe 251 të Kodit të Procedurës Penale.

Për shtetasit e ndaluar/arrestuar të huaj, ishin përgatitur letra me të drejtat e të ndaluar/arrestuarve në 6-të gjuhë të huaja, si anglisht, frëngjisht, italisht, greqisht, gjermanisht, maqedonisht dhe gjuhën rome.

Gjatë inspektimit u konstatua se në korridoret e mjedisit të shoqërimit dhe të sigurisë të Komisarariatit, ishin të afishuara postera me të drejtat ligjore të personave të shoqëruar në organin e policisë dhe të personave të ndaluar/arrestuar.

Nga intervista e zhvilluar nga grupi i inspektimit, u konstatua se zbatohet e drejta për njoftimin e familjarëve të personave të ndaluar dhe të arrestuar në flagrancë, sikurse parashikohet në nenin 34/b pika 1/c të Kodit të Procedurës Penale. U konstatua gjithashtu se, në regjistër ishte evidentuar dhe emri i personit familjar apo të afërm të njoftuar që lidheshin me personat e shoqëruar në mjediset e policisë, si dhe ora e njoftimit të tyre me telefon, sipas rubrikave në regjistër.

Grupi i inspektimit konstatoi se, vizita mjekësore nga ana e mjekut (me kontratë me kohë të pjesëshme) kryhej rregullisht brenda afatit 12 orësh nga momenti i vendosjes së këtyre personave në këtë ambient, sikurse përcaktohet në procedurën standarde, si dhe mjeku ishte prezent sa herë kërkohej nga personat që ndodheshin në dhomat e sigurisë.

Vizitat mjekësore ndaj të ndaluar/arrestuarve, konstatimet, rekomandimet dhe mjekimet e dhëna pasqyroheshin në kartelat ditore dhe regjistrin e vizitave mjekësore. Në rastet e urgjencave, me rekomandimin e mjekut të sëmurët shoqëroheshin menjëherë në Spitalin Rajonal të Korçës. Nga kontrolli i dosjeve mjekësore të shtetasve të ndaluar/arrestuar, rezultoi se, ishin hapur kartelat mjekësore (*kartelat ditore*) të tyre, të cilat vendoseshin në fashikullin përkatës për secilin prej tyre.

Për sa më sipër, bazuar në pikën 3 të nenit 63 të Kushtetutës ku përcaktohet se: “*Avokati i Popullit ka të drejtë të bëjë rekomandime dhe të propozojë masa kur vëren shkelje të të drejtave dhe lirive të njeriut nga administrata publike*”, nenit 21/b të ligjit nr.8454, datë 04.02.1999 “*Për Avokatin e Popullit*”, i ndryshuar, ku përcaktohet se: “*Avokati i Popullit paraqet rekomandime për vënien në vend të së drejtës së shkelur tek organi administrativ, që, sipas tij ka shkaktuar shkelje të të drejtave dhe lirive*”, si dhe nenit 81, pika 2/b të ligjit 81/2020 ku përcaktohet se Mekanizmi Kombëtar ushtron këto kompetenca: “*paraqet rekomandime për organet përkatëse, me qëllim që të përmirësohen trajtimi dhe kushtet e individëve që u është hequr liria dhe të parandalohet tortura, trajtimi ose dënimi i egër, çnjerëzor ose poshtërues*”:

REKOMANDOJMË:

1. Marrjen e masave për plotësimin me korrektësi rubrikën njoftimi i familjarëve tek Regjistri i personave të shoqëruar dhe evidentimi i tyre në këtë regjistër. Të evidentohet qartë ora e njoftimit, numri i telefonit të familjarit që u njoftua.
2. Marrjen e masave për ndërtimin e tualeteve të ndara për gra dhe burra të pajisura me mjetet e domosdoshme për këtë qëllim sipas parashikimeve në procedurën standarde “Rregullat teknike të shoqërimit në mjediset e Policisë së Shtetit”, miratuar me Urdhrin e Drejtorit të Përgjithshëm të Policisë së Shtetit nr. 938, datë 24.07.2019.
3. Marrjen e masave për pajisjen e tualetit të dhomave të dhoqërimit me ndriçim dhe riparimin e derës mbyllëse të tij.
4. Marrjen e masave për vënien në funksion të dy tualeteve me (dush me ujë të ngrohtë) me qëllim që të ndaluarit/arrestuarit të kenë akses për larjen e trupit në një ambient të posaçëm.
5. Marrjen e masave për krijimin e zyrave të përshtatshme për marrjen në pyetje/intervistimin e shtetasve gjatë kryerjes së veprimeve procedurale nga oficerët e policisë gjyqësore kjo referuar fluksit pritës të personave shoqëror/arrestuar në këtë Komisarariat.
6. Marrjen e masave për krijimin e ambientit të ajrimit për personat e arrestuar në këtë komisarariat.

Për qëndrimin dhe masat që do merrni në zbatim të këtij rekomandimi, të vihemi në dijeni brenda afatit 30 ditor sipas nenit 22 të ligjit nr.8454, datë 04.02.1999 “Për Avokatin e Popullit”, i ndryshuar.

Duke besuar në mirëkuptimin dhe bashkëpunimin tuaj,

KOMISIONER

Ahmet PRENÇI